

PRAVILNIK O LICENCIRANJU ODBOJKAŠKIH TRENERA U ODBOJKAŠKOM SAVEZU FEDERACIJE BOSNE I HERCEGOVINE

član 1

Ovim pravilnikom se regulišu uslovi i način licenciranja odbojkaških trenera za stalna takmičenja odbojkaškog saveza FBiH.

član 2

Odbojkaški klub za takmičarsku sezonu može licencirati trenere za sljedeće dužnosti:

1. Trener „A“;
2. Trener „B“;
3. Trener A ili B specijalista (za fizičku pripremu), statistiku i dr.

član 2.1.

Svi treneri moraju biti članovi trenerske organizacije. Svaki trener mora imati ličnu akreditaciju koju obavezno nosi na svim zvaničnim utakmicama.

Akreditacije će, u skladu sa Zakonom o sportu, imati oznake A i B. Sa "A" akreditacijom treneri će moći voditi ekipe na utakmicama Premijer lige BiH, Super lige FBiH, Prve lige FBiH, mlađih kategorija i Kupa BiH. Sa "B" akreditacijom treneri će moći voditi ekipe na utakmicama Super lige FBiH, Prve lige FBiH, mlađih kategorija i Kupa BiH.

Troškove prve registracije (legitimacije) u visini od 400 KM snose treneri lično (ukoliko ove troškove plaća Klub cijena je 400 KM+PDV).

Visinu godišnje trenerske članarine za tekuću sezonu određuje Upravni odbor i objavljuje je u Aneksu propozicija takmičenja za tekuću sezonu.

član 3

Klub je obavezan licencirati za Premijer ligu BiH minimalno 2 trenera, a za Super i Prvu ligu FBiH minimalno 1 trenera. Bez licenciranog trenera ekipa nemože nastupati na zvaničnoj utakmici.

član 4

Uslovi za licenciranje su:

1. odgovarajuća stručnost predviđena Zakonom o sportu BiH i pravilnikom o kategorizaciji trenerske organizacije OS FBiH,
2. potpisan i ovjeren ugovor klub-trener,
3. popunjen trenerski karton i fotografije u digitalnim obliku.
4. mora biti član Trenerske organizacije OS FBiH,
5. ljekarsko uvjerenje odgovarajuće zdravstvene institucije.
6. Prisustvo na seminaru i položen test na seminaru.
7. Odluka Upravnog odbora o drugim uslovima.

Član 5.

Treneri koji na testiranju ne polože ispit imaju pravo ponovo polagati ispit putem testa i kada polože odnosno osvoje dopvoljan broj bodova tada dobijaju licencu za tekuću sezonu. Drugo polaganje ispita se plaća 300 KM +PDV. Bez izvršene uplate trener nemože pristupiti ponovnom polaganju. Ukoliko neko ne položi i drugi put test gubi pravo dobijanja licence za tu sezonu. Rok polaganja ponovnih testova je 30 dana od dana kada su polagani testovi na seminaru.

član 6

Licencu za rad sa ekipama u OS FBiH mogu dobiti treneri koji ispune uslove iz člana 4. ovog Pravilnika. Treneri statističari mogu dobiti licencu OSFBiH uz odgovarajuću potvrdu od OS BiH da su prisustvovali seminaru statističara.

član 7

Zahtjev za licenciranje trenera klub dostavlja Registracionoj komisiji, uz dokaze o ispunjavanju uslova iz člana 4 ovog pravilnika.

član 8

U cilju praćenja razvoja odbojke i sticanja novih odbojkaških znanja, najkasnije 15 dana prije početka nove takmičarske sezone, Trenerska organizacija OS FBiH organizuje seminar kojem su obavezni prisustvovati svi treneri.

Neopravdano odsustvo sa seminara dvije godine za redom povlači gubitak prava licenciranja u tekućoj takmičarskoj sezoni. Za one trenere koji ne budu bili na seminaru registracija i licenca će koštati 2000 KM+pdv. Trenerska registracija i licenca košta 350 KM + PDV , za one koji su prisustvovali seminaru. Seminar plaćaju treneri ili Klubovi za iste po Odluci U.O.OSFBiH. Treneri koji nemaju uslove za licencu „A“ a žele da je imaju ona košta 3.000 KM +PDV.

član 9

Treneri strani državljani mogu se licencirati pod istim uslovima kao i treneri iz FBiH ako posjeduju radnu dozvolu izdatu od nadležnog organa i uz dostavu dokumenata od nacionalne federacije o njegovom stručnom radu.

Klubovi koji angažuju trenere, strane državljane, snose punu odgovornost za valjanost i rok važenja dokumenata koji su potrebni za registraciju i licencu trenera, te nastup u toku takmičenja na svim nivoima.

član 10

Svi treneri koji pred početak sezone ispune uslove iz člana 4, na zahtjev kluba mogu dobiti registraciju i licencu u toku takmičarske sezone. Registraciju i licencu izdaje Registraciona komisija OSFBiH

Registraciona komisija OSFBiH sve poslove, po pitanju licenciranja trenera, obavlja do početka takmičarske sezone. U toku takmičarske sezone ove poslove preuzima direktor takmičenja ili osoba ovlaštena od Predsjednika Registracione komisije.

član 11

U toku sezone dozvoljeno je vršiti licenciranje trenera na zahtjev kluba i ispunjenim uslovima iz člana 4. ovog Pravilnika , u sljedećim slučajevima:

1. ako licencirani trener sporazumno raskine ugovor sa klubom, te ne postoji nikakva dugovanja na relaciji klub-trener propisano ugovorom koji su potpisali klub-trener,
2. ako je licencirani trener iz opravdanih razloga spriječen da obavlja svoju dužnost duže od mjesec dana (bolest, školovanje, trudnoćko odsustvo i drugi opravdani razlozi),
3. ako klub nije zadovoljan radom i rezultatima licenciranog trenera, uz isplatu ugovornih stavki do datuma otkaza.

član 12

1. U situacijama kada licencirani trener ima potraživanja od kluba a prema važećem ugovoru trener- klub, klub ne može licencirati novog trenera dok ne realizuje potraživanja u predviđenom roku prema treneru po važećem ugovoru trener-klub,

2. U situacijama kada se vodi spor trener-klub, trener ne može biti licenciran za drugi klub, do okončanja rješenja spora sa klubom, potraživanja u predviđenom roku propisanom ugovorom trener-klub.

član 13

Klub koji u toku takmičarske sezone ostane bez licenciranog trenera kako je predviđeno članom 10 ovog pravilnika, može licencirati novog trenera ako ispuni uslove iz člana 4. i člana 11 ovog pravilnika tačke 1.

član 14

Klubovi koji imaju žensku i mušku takmičarsku ekipu, u skladu sa Članom 3. ovog Pravilnika, moraju licencirati trenere za svaku ekipu posebno.

Treneri tokom takmičenja mogu voditi isključivo ekipu za koju su registrovani/licencirani. Napr:Licencirani trener za mušku ekipu može voditi i u mlađim kategorijama muške selekcije, dok žensku ekipu i ženske selekcije nemože voditi samo trener licenciran za žensku ekipu. Naziv ekipe koju trener može voditi se upisuje u takmičarsku legitimaciju trenera. Prije početka utakmice takmičarska legitimacija trenera se dostavlja delegatu-kontroloru na uvid.

Trener može na utakmici obavljati i funkciju Igrača. Mora imati obje licence i biti upisan u zapisnik. Kada nije u terenu onda vrši funkciju Trenera pod uslovom da mora obući gornji dio trenerke, kada uđe u teren tada vrši funkciju Igrača. Ukoliko Trener ima ulogu aktivnog Igrača kojeg je mijenjao libero, može obavljati funkciju trenera na klupi sve dok je libero u igri. Trener-Igrač može biti kapiten ekipe samo kada je u terenu. Sankcije za ovu funkciju su spojive. Ovo prebaciti u Propozicije takmičenja

član 15

U slučaju da mlađe selekcije jednog kluba nastupaju u muškoj i ženskoj konkurenciji primjenjuju se odredbe Člana 13. ovog Pravilnika.

član 16

Upravni odbor, na prijedlog Trenerske organizacije OSFBiH, dodjeljuje počasne trenerske licence. Počasna trenerska licenca se dodjeljuje pojedincima za izuzetne rezultate u razvoju odbojkaškog sporta. Upravni odbor OSFBiH propisuje uslove za dodjelu počasne trenerske licence donos.

Član 17

Sastavni dio ovog pravilnika su obrasci za licence.

član 18

Sve što nije predviđeno ovim pravilnikom, a vezano je sa postupkom licenciranja trenera rješava Upravni odbor OS FBiH.

član 19

Tumačenje ovog pravilnika daje Upravni odbor OS FBiH.

član 20

Ovaj pravilnik stupa na snagu danom donošenja, stupanjem na snagu ovog Pravilnika stavlja se van snage Pravilnik br. 2068-06/24, od 12.06.2024. god.

Broj: 2207-06/25
Tuzla, 11.06.2025

PREDSJEDNIK

Fatić Alija dipl.pravnik